

摘藻堂四庫全書薈要

集部

欽定四庫全書薈要

集部

御選明詩卷二十八

欽定四庫全書薈要卷一萬八千五百二十八

集部

御選明詩卷二十八

五言古詩十三

張翀

別貴竹諸友

十年與君遊千里與君別把袂意不言含杯氣欲絕漸
隔瀟湘雲空留夜郎月一曲瑤琴彈知音對誰說

楊綵



鴈門述懷

昔稱鴈門郡嵯峨抱萬山樓煩隱天際滹沱水潺湲寒
沙慘白日北風摧朱顏封侯詎非願王事顧多艱丈夫
志四方茲遊何時還

李蔡

曉夢陳晦伯

人皆競榮達君獨嗜編撰廿載歷中外蹉跎寡青眼竭
來共為郎相過每一莞溪水鳴小筵花林具薄饌修禮

或五漿餐和詎一盞直衷肩衛鮑博物跋鄭產鼯鼠渙
羣疑竹書徵脫簡伊余硜硜心相得意何限一朝江浦
別重覲杳未偁春夢兩悠悠覺來淚痕潛我聞天中山
青霞接巉巖何時攜謝詩青天醉新醖

雨花臺讌集

休衙松日高出郭溪風送蘭棹漾晴波花林煖香夢輕
雲蕩我胸萬象可撫弄綠竹搖崇丘青烟發巖洞踞險
把金樽悅此山鳥哢翩翩遠帆回稍稍疎鐘動良會不

可常歸鞍且遲控

送唐生

江頭春日高看爾乘杯去淑氣澹宜人淮山雨邊曙田
鼠方化鴛岸柳未成絮傾囊貯詩草撫誦自厭飫醵酒
噉花神江山發靈助長安九天高文章滿朝著男兒筆
札間往往收名譽時復夢江南羈魂向誰語

周詩

赴天津

仲夏衆芳歇沃野羣卉稠曜景窮北陸薰風獻南陬伊
余赴期會東驚戒方舟晴雨遞昏晝涼燠變絺裘滌洄
見湖澳寂歷懷滄洲結髮事明主策勲慕前修名賤業
匪建時往命不猶才將世塗左道與隱者謀漆園侈達
生柱下崇致柔優哉聊卒歲庶以謝愆尤

胡直

登衡嶽

弱齡慕遐舉中為世網嬰雖抱及物志而非濟時英家

本衡廬交早負泉石盟秉憲涉湘沅吏事滋牽縈靈岳
奠疆域渺若隔蓬瀛恭承帝新命駕言自西征迴車恣
探歷使我夙心傾朝墩蕩雲巘導我游上清吾衰疲塵
鞅學道未有成安得同心友眷言事耦耕

姚汝循

夏夜對月

落日暑暫歇微風蕩靈襟囂塵淨庭宇竹樹森繁陰皎
月牆東來照見石上琴揮手一再鼓悠然生遠心鍾期

久不作千載誰知音

沈節甫

題且住軒

此邦非吾鄉此室非吾廬情知匪久客且復卜其居蕭
蕭環堵中俯仰欣有餘天地為逆旅百年亦須臾羲娥
無停轂吾生自有初念此坐長歎秋風起庭樗飄蓬任
回飈素位恒晏如

錢鎮

山中雜興

結廬傍青山，繩樞爲牖生。涯陌上桑行，逕門前柳獨。
行，媿踽踽顧盼，無與偶。策杖求友生，陶潛去我久。豈伊
逃醉鄉，翻念魯中叟。寂寞柴桑間，寄意千載後。廬山舊
遊路，往跡今已朽。古今諒同轍，悵望一搔首。

張祥鸞

雨後偕沈道升登華陽

微雨曉來歇，新晴媚花柳。愛此風日佳，尋山挾歡友。呼

童巾柴車行行上隴首蒼翠近轉濃攬之欲盈手佳木
翳清泉雜英被林阜為訪稚川家仙桃著花不

石湖訪舊

黃葉落不盡平湖澹無波泛舟湖上來訪舊青山阿長
揖謝故人六載今重過豈不念清標遠道成蹉跎向來
山中月依舊清光多呼酒斟酌之君起為我歌歌長山
月落醉顏亦已酡揮手別君去奈茲良夜何

虎丘山房

僧屋翠微半窈窕青苔路空林無鳥聲白雲自來去遠
尋素心人直到雲深處振衣臨高臺夕陽在紅樹

晚春韋莊水亭

十日不出門出門芳草晏遠岫晴雲滋緒風啼鳥變高
樹夾廣路雜英滿遙甸入寺不逢僧經聲隔松院嘯坐
小山南紅藥當階亂曲池清且連明滅孤亭畔蒲葉綠
於水藤花落如霰斗酒價十千春衣聊可換

濟上曉行

水落不盈尺舟行帳多阻對此明月光清宵泊枉渚夜
闌新水來稍覺舟人語解纜及晨流孤帆曉容與攤書
坐蓬窗風簾散微暑遠視浮雲征飄飄薄何許豈不戀
舊山隨風忽遐舉感此賦行邁含情獨延佇

東郡道中早行

雞鳴庭樹曉漏斷晨星疎濃霜白於玉皎皎塗堦除攬
我征衣裳出門復驅車數里始辨色井屋炊烟初日氣
結朝霞絳色橫扶餘已欣遠懷曠復懽塵眼舒馬嘶驛

樓近晨風吹白榆計程尚千里歲晏歸吾廬

招隱山樓看月

長嘯翠微半山月忽東上松際露清光攬之不足掌歡
友兩三人開窗坐間敞宿鳥赴幽期飛泉遶清響有酒
旨且馨有月皓以朗長吟招隱詩臨風寄遐想公子歸
去來山中瑤草長

題閔道士山樓

仙人喜樓居架樓青山曲嘉樹一千章色映窗櫺綠調

鶴白雲端汲澗華陽麓來往不逢人馴鹿閒相逐

東平道中

驅車涉長道荒塗曠無人斜陽澹古木驚風翼征輪候
館莽牢落日暮寒城闔停驂一以憇振我衣上塵庭樹
集歸鴉依依得所欣如何客遊子不念平生親

申時行

遊一雲寺

寺在晨臺山下
其地有菊泉

散步出平林窮攀躋高頂冷然天風來曠蕩非人境晨

臺聳翠屏菊泉注金井丈室禪燈明祇園佛日永青浮
雲一丘碧破天萬頃古檜結重陰疎篁散清影寺深山
更幽雨至風忽猛繞徑莓苔生憑軒衣袂冷坐久不知
還盤桓弄餘景勝遊俱幻迹悠然動深省

登穹窿山入寧邦寺

昔聞陽山高不敵穹窿半而我登其顛振衣凌汗漫居
然五嶽尊突作三吳冠天目來蜿蜒具區環浩渺排雲
豁洞庭出日恍秦觀邃谷吐烟霞層巒入霄漢盤紆磴

道危杳靄峰紋亂石裂紛下馳厓崩劃中斷峻嶒結鷺
頭逶邐出龍幹鐘磬發林間招提在天畔古松剝生皴
豐草深沒肝藤塢既蒙茸雨泉亦漫漈傳聞古魚吏白
日生羽翰仙踪不可求目境有餘玩辟穀辭人間頗與
赤松伴

感懷

朝旭暎芙蕖天然發華姿涼飈振梧桐落葉何紛披物
性從所受榮瘁固有時璣衡自旋轉陵谷常遷移良貴

匪軒冕真樂在茅茨所以考槃士衡泌獨棲遲亭亭傲
霜柏藹藹傾陽葵優游以終老素心恒自持

林煙

諸公餞送城南樓寄謝

冉冉歲云暮于役殊未休冠蓋集相送置酒城南樓微
雨霽朝景騁望消人憂蒼蒼遠山色浩浩清江流丹楓
羅曲岬白鳥戲中洲景物紛可悅驪歌促行騶衡門昨
棲遲杖屨忝從遊奈何遠離別一日如三秋索居感羈

旅久要慕前修適意豈非達
狗祿良足羞山靈勿相誚
早晚歸林丘

府江渡

朝發陽朔崖暮次昭潭渡行邁千餘里孤舟日東驚
川途阻且長耳目漸非故巉巖夾崇山杈枒羅茂樹
四望寡人烟三時昏瘴霧深林蹊徑絕怪石波濤怒
虎穴幸徙蹤狼烽猶置戍客子獨何為艱險常道路
雖懷叱馭心寧免垂堂懼白日易蹉跎玄髮忽改素
人生苦拘束

多為浮名誤萬事良悠悠達生庶可慕

苦雨述懷

我行赴京華征塗纔及半渡江越淮南原隰何渺漫
暑當茲時氣候變昏旦迅雷激中宵陰雲翳層漢山雨
驟淋漓川流俄皓泫陽烏避何許水鳥羣相喚高浪沒
危橋飛湍瀉崩岸我馬淖不前我車鞅已斷屈詰厯羊
腸回顧屢顛汗僕夫仰天號客子撫膺歎吁嗟行路難
徬徨日將晏塵中苦局促物外思蕭散挂冠亦由人何

事長羈絆

王叔杲

聞鴈

涼風起天末孤鴈獨南翔
攬衣步庭除仰視明月光
舉酒屬賓朋歡宴夜未央
憶昔事遠遊客居易水陽
迢迢望天末鬱鬱思故鄉
嗷嗷聆飛鴈零零霑衣裳
感之一懷注惻焉棄椒觴
往事不可陳終夜徒悲傷

山齋獨坐懷友人不至詩以招之

投迹寄空門幽懷日虛泊境寂山氣佳日午庭陰薄新
鶯未停囀初篁漸舒籜愛此林樹芳官然坐丘壑故人
萬里至約我移觴酌今朝風日熙乘閒眺虛閣

別高叔崇

仲夏林木變愛此黃鳥鳴同聲宛相和悵然懷友生良
辰忽以改歡會難久并征夫理鞍轡夙駕侵晨星停驂
酌君酒湛湛芳尊盈

尊盈豈不飲離緒紛難任送子陟岡阜浮雲布輕陰悠

悠遵往路默默涕盈襟豈無同門友念子意彌深游鱗
戀新侶飛鳥懷故林湘江浩無涘衡嶽何嶽崙願因秋
風起惠我瑤華音

錢貢

京邸懷歸適唐楮汀來謁於其還賦長句言別
此日意不樂掩關有所思忽聞君遠來錯愕令我疑平
生不辭鄉安得來京師去年與君別屈指已一期南望
懷故人日與浮雲馳嗟予坐羈束素顏日以緇金門盛

才賢迂疎將何為感之百憂集歎息還自嗤君今馬首
南握手復何辭投簪雖未能煩君語吾兒貧賤雖爾慚
富貴匪我期願言各努力勉將門戶支予家柞溪東綠
水環茅茨豈獨饒桑麻松竹植亦宜好闢十畝園樹藝
須及時護筍編枳棘灌花引泉池待予此中老與君同
栖遲此願良未果永懷常在茲去去勿復陳人生多別
離夜闌欹枕卧暑雨捎罍罍

許國

登風月樓度凌波橋憩愛蓮堂觀荷有作

南國芙蓉花昔賢聊寄意芬芳播海隅
臺沼足佳致層樓瞰清泠孤樹隱荷芰
水上卧長虹空中舉香袂凌波弄素影
俯檻散幽思殘萼已飄紅疎莖猶疊翠
杯搖暮霞色衣染秋霜氣澹爾言已忘
悠然心自媚盈盈隔笑語采采憶交契
落日更登樓風月見光霽

擬御製勸農詩

四民皆天職嗟農獨苦辛所以古哲王
巡省及茲辰簫

鼓吹豳詩訓迪良諄諄東郊土脈動好鳥鳴芳春桑間
拂其羽催耕一何頻乘時播嘉種原隰何昃昃念茲民
所天珠玉安足珍一日苟不作飢寒將立臻勿惜沾體
勞但憂年歲屯沾體勞尚可歲屯傷我民憶昔先皇時
端居軫郊閭載賡憫農咏丕揚烈祖仁禁苑籍千畝雨
暘雩百神玉食豈不足貴令四海均九重高結念况爾
謀其身古人有良言歲計在於寅豈伊公家賦婦子亦
相親春風正發育萬物皆鮮新勉以東作力佇見西成

裡

周子義

送何小坡致政還信陽

海鶴遠置網冥鴻謝鞬籠人間千丈絲安能繫游龍所
以達命士脫迹塵囂中眇茲盈尺組曾是羈我躬何侯
東海彥司牧早奮庸一麾指淮右載旆佐漢東斯民有
父母國論方爾崇朝宗甫竣事高蹈隨赤松薄言戒行
李云歸天目峰惜此遠行別不得少從容載歌驪駒詞

聊以紓我衷

林如楚

翫月有所思

白顥應潛運朱明時浸沉回飈釋炎溽虛堂延夕陰
簾透雲光薄池涵苔色深螢火穿野蒿牀下莎雞吟
如何袵絺子佇受涼氣侵素月出東嶺飛輪迴自摺
金波沒遠漢翠靄掩修林茂篁無疎影栖鳥有駭音
泠泠鑑冰簟悠悠滌予襟翫茲不成寐兀坐思難任
北牖湛清醑

東窗開玉琴不惜斷琴絃但恐傷琴心傷心在何處宛
在滄江潯勞我代木意叢桂祇蕭森

潘志伊

題存石草堂

名園迴塵域參差開石林丹梯襲曉光碧嶂含夕陰昔
自鬱林來置此閒幽襟緬彼巨靈跡宛在梧江潯夫子
肯堂構誅茅面雲岑棲巖意已遠陟謁思逾深振衣緣
磴道拭目見嶽峯茲言懷仰止誰謂慙登臨

歸有光

沛縣

泗水抱城闔東去日粼粼豐沛至今存漢事已千春嗟
我亦何為獨歎往來頻封侯不可期白日坐沉淪每見
沛父老旅行泗水濱空傳泗水亭井邑疑未真城外綠
楊柳高帘懸風塵猶有賣酒家王媪幾世親高廟神靈
在英雄却笑人

自海虞還阻風夜泊明日途中有作

百里見青山言旋諒非徐風波仍水宿龍蛇驚夜居明
發尤慘淡川途尚修紆水駛凌方約雲寒日未舒彌亘
多芳草寂歷少畋漁寒光冒明湖朔風轉高墟舊事成
往跡餘生惟讀書古人不可見歲暮安所如

淮上作

長淮餞落日圓光正如赭傾紅注流波殊景不可寫淮
水自西流黃河從北下併合向東行終年無停瀉哀此
千里客春至復已夏獨立空惆悵所與晤言寡

奉託俞宜黃訪求危太樸集并屬蔣蕭二同年
及長城吳博士

昔年宋學士嘗稱太樸文獨力撐頽宇清響薄高雲余
少略見之諷誦每忻忻淡然玄酒味曾不涉世氛如欲
復大雅斯人真可羣苟非知音賞宋公安肯云嗟乎輕
薄子狂犬方狺狺惜哉簡袞亡家麓少所蘊徒為嘗一
臠盈鼎未有分四賢宦遊地博達多前聞為我一咨訪
庶以慰奉勤

磧砂寺

望見石柱立知是招提址蓮宇已燹蕩土牆何迤邐
淡遠天色梅花帶寒雨溪迴竹樹交風吹鳥雀起日暮
湖波深蒼茫白雲裏

和俞質甫夏雨三十韻

浮雲方變隼光景遂已戢決旬深靈澍千里破封蟄
茫河伯歎蕭蕭山鬼泣靈曜邃高居朱明閔赫翕希微
澹將開浙瀝吹又急遇夜轉連綿醞流更潄渠萬壑嘯

震鳴百川灌注入池容添紋縠林色浸淤泥離畢月暫
耿宿井星恒濕潑潑湖光翻蹙咽海潮澀霓旌尚高翔
雲衣猶日緝水覆詎可收天漏誰能葺馬牛三江混鴻
濛九峰立嗟我來自東獨行阻虛邑夢裏思明兩筮坎
成游習誰假卜商蓋但戴杜甫笠繽紛餘花落寂寞愁
烏集窮巷長閉門高河近通汲天地政氤氲雷風遞呼
吸淒淒聽晨鳥濛濛睇宵熠作人徵時暘思文憂民粒
龜黿費灰洒魚蝦饒掇拾廣室坐增淒匡牀聽生悵何

由度日閑安能使家給泥塗跣重繭梅潤侵什襲寒袍
故戀綈瀾簡慵啓笈顧歎風雲湍寧使蛟龍蟄短屐徒
齒齒折巾空岌岌俯仰觀宇宙塊北迷原隰阻饑知不
免寅亮豈所及

邢州敘述

為令既不卒稍遷佐邢州雖稱三輔近不異湘水投過
家葺先廬決意返田疇所以泣岐路進止不自由亦復
戀微祿敝裝戒行舟行行到齊魯園花開石榴捨舟遵

廣陸黎棗列道周始見裁首宿入郡問驛驢維當撫彫
瘵天馬不可求閭閻省徵召上下無怨尤汝南多名士
太守稱賢侯戴星理民政宣風達皇猷郡務日稀簡吾
得藉餘休閑門少將迎古書得校讐自能容吏隱退食
每優游但負平生志莫分聖世憂竚待河水泮稅駕歸
林丘

袁尊尼

長安感遇

朱華謝南土遊子客冀方豈不念過歸簡書勞未遑悠
悠若懸旌倏忽意靡常魏牟阻江海蘇子怨河梁失路
良可悲曠望迷周行春陽念將歇滯淫非我鄉願假鸞
斯翼超飛歷故疆

施愛

寄李五

噫嘻復噫嘻與君恒別離祇隔一溪水相見良難期芊
芊池畔草灼灼園中葵倏然悲風來凋謝實淒其思君

令人老玄鬢忽成絲贈君青萍劍神物各有時

王嘉言

遊清涼洞

山行恣眺望物色有明晦逼仄紆苔徑繽紛洩竇瀨窟
壓雲水邊步跼蹐确內深探毛骨淒周視巖壑大峽束
路若窮石懸勢欲墜蒨蔥古樹排巖崕細岑對蕊開噴
微芳衣潤浮幽靄搖竹動碎金翻羅拽長帶奇峰喜駁
犖飛泉駭訇磕罰籌擬蝟毛謹聲混江汰將暝促駕還

共愜斯游最

皇甫冲

維摩寺雨坐

回嶺無仄徑陟岡有夷壤展睎入空濛遊心益昭朗長
風吹輕衣飄搖翠微上古寺迷夕煙明燈澹綃幌冥雨
從東來驚雷自西往林巒忽不見但聞山澗響景寂非
避喧心瑩乃成賞為禮沉痾踪因之知幻象

於巖石上眺東西兩湖

旭踐山中蹊午憩巖上石雲移石欲墮雨霽蹊猶濕倚
策眺兩湖波光渙相襲東若既紆青西衡亦凝碧芙蓉
落雙鏡天影浮重壁不覩水分流但覺洲如織檣烏有
離聲磯鷗無並翼會茲物化情感彼高深迹從適得所
遣何為苦拘迫

上巳觀田橋袂袂望所期客

青山結層嵐新流漾周澤陽景屬良辰遊人滿晴陌聯
翩塘上行去來江邊客拾翠行且留擷芳散還集臨賞

遲所思搖搖冀來覲夢寐時見之寤言忽復隔昔人三
秋懷宵旦今屢易為問修禊人憂心何能被

皇甫湜

代古

朗月升東隅流輝照苦顏愁思撫清夜房櫳淒以閒玉
墀花稍積簷鳥雙飛還凝薰空錦衾游塵集綺絃馳波
豈盡意浮雲難結言所恨千里遙所望一水間

春朝雪後

拂曙啓荒扉雪照蘭林瑩迴榭眺氛氲層原閱彌亘春
動鳥數聲晴開煙一徑欲訪垂綸人悠然五湖興

發郡城之天台道中述所經覽寄孔謝二憲副
趙何二僉憲同年

夕夢層城阿曉行滄波上縈溪復含流連岑時隱障風
湍信千轉雲峰非一狀錦繡紛迎翫氤氲忽彌望蘭泉
芬可掬苔壁險難傍思偕同懷子携手追禽尚

雨夜雜思

清齋隱蘿月，簷暝滋林巒。
澤國夜溪雨，亭皋春草寒。
山光帶滉漭，池響交檀栾。
憶處畏入夢，遙遙獨寤歎。

春日齋中即事

仲春氣妍和，蘭薄幽可踐。
開軒眺遠野，文霞靄層巘。
黃鳥鳴芳菲，綠蘋泛清淺。
感物懷古人，緗帙聊自展。
嘗欽柳下黠，頗悅邴生免。
苟持齊物心，得喪兩俱遣。

雜詩

凝霞晦朱陽，繁雲結玄陰。
有渰興崇朝，淫溢遂成霖。
涌

溜交簷曲浮苔冒水潄冥霧縈綠池悲風激丹岑惟彼
倦遊客感此物序侵慕類興長懷含思寄微吟

秋日雜詩

廓處乏歡悰出門眺長衢悲風吹落日四顧無行車蹉
跎失盛年感慨獨嗟吁況我在樊籠六翮不得舒撫劍
思西邁安能守故廬淮陰困閭里馬生戀邊隅桑梓豈
我志蓬蒿非我虞行行舍此去去去浮雲俱

贈韓侍御謫滁州

皦皦原中日照此城闕寒登山送歸客臨塗悵盤桓借
問子何之奇服涉江干遠斥千里道飄飄冒驚湍急觴
遡征雲悲風激長瀾我馬懷層岡佇立發哀歎忼慨無
所道贈子以加餐

月夜贈伯氏叔季氏山人以言

歡游美清夜高會良在茲金飈薄綺櫺鮮雲蕩華池涼
氣發喬林湛露零丹堦皎月升前隅中庭粲其輝密親
既已具蘭友相攀追繁音豈不奏所樂吹塤箎齊願等

金石皓首長不暝

送周氏

清晨餞我友，駕言遠徂征。
前瞻齊魯墟，千里浮雲興。
親交豈不昵，懷役不遑寧。
曠野饒悲風，揚塵翳邊庭。
中衢雪霰集，邊馬寒無聲。
蹊谷無行跡，側足層冰橫。
回首望京闕，能不惻中情。
子其祇自愛，順時保榮名。

予嗜琴山人張子妙得古法嘗學焉而予輟響久矣舟夜臨流對月發琴而彈之興慨命篇

伊予寡世姿由來慕丘壑長從嵒生玩假物思所託匪
盡至人理聊叙逸民樂改服睽宿心久負長往諾石房
綴幽響泉蕊迎秋落沿沂開昔襟浮彈昨間作滄波流
潺湲明月照灼爍想見乘風人長懷披雲鶴且以慰營
魂拊心終繇邈出處焉是非俛仰笑今昨

雜興

驚節流炎紀馳暉屆清商游魚湊重淵蟋蟀鳴空堂白
露滋前墀陰風來北房我心亦何思所思天一方離居

宛如昨再覩鴻雁翔含情撫遙夜申旦獨徬徨哀彼采
葛詩零淚沾衣裳

茅山

杳靄登春山嵯峨入雲嶺微竒不覺遠發興日初永石
叢孤亭秀花覆仙竈冷長揖山阿人坐使塵慮屏

自溪口歸

朝來醉別酒溪上孤舟還遙村轉江路落日迷松關平
波望煙樹百里蒼茫間坐愛丘中事春雲留碧山

使中都道中作

將命適遠京
夙駕戒征侶
臨流別友生
野塗曠延佇
靖恭爾所敦
我志不遑處
揚旆越修垌
舒節薄蘭渚
日夕秋風生
曾是歲不與
淒淒聆候蟲
肅肅望歸羽
蘊結愁我心
沉憂誰能去
悟彼詩人言
歸來藝稷黍

皇甫汈

夏日來鳳亭小集各賦

首夏猶芳月
終宴就薰風
泛觴蘭水上
置座竹林中
飛

花代舞似鳴鳥當歌同笑將愁暫破醉遣累俱空更待
西園景留賞北山叢

春夜游西園同諸兄弟作

佳節值瑤燈清夜游金谷良友披蘭襟懿親儷芳躅經
過敞榭邊徙倚寒塘曲遵渚雖近尋翫峰生遐矚軒冕
幸暫違簿領謝羈束跡非三徑荒情是一丘足鏡裏髮
始華尊中酒初綠及時不為歡坐遣春光促

奉荅子安兄歲暮見貽

在昔參英僚俱承明主顧被服紛妍姿
纓纓儷芳步悲哉游子情徒以潛郎固
一為衝飈激遂使佳期誤入魏悵無倚
浮湘眷有慕揚旌指敝廬千里同歸路
再聞蟋蟀唱兩見蕪葭露曜靈本易傾
馳運豈難度端居懷苦心苦心誰與晤
但感時不然何嗟歲云暮

始至澶州作

自我謝郎曹竭來守吏局塌翼懷奮飛
低眉就羈束驅役遵旄丘興歌睇淇澳
愧乏沂海謠何以佐明牧幸寡

宣城辭間可理尺牘升既等凌喬沉亦悟陂復芳草合
江程清猿吟旋轂衛水日東流因之鑒心曲

同蔡中郎過王負外宅懷子安兄

委巷駐高車清溪夾幽宅細雨急逝年凝燈照寒夕依
同南樹情飛異西陵蹟為假雲中翰一寄天台客

往視城南別業

夙齡不事產落魄懷英風抗志雲霄外絕戀蓬蒿中避
世豈在遠漢廷聊見容未識山川險安知途路窮兩自

違京輦久欲返臨邛疏公有遺業精舍開牆東命策值
蕭序覽物感情悰逕密多陳莽林荒非故叢昔往候門
稚今歸成哀翁鳴蜩若騰笑馴麕儼相從搏飛之高翼
何為苦微躬吾廬倘可適稅駕幸來同

鳥散餘花落

春來啼鳥伴相逐百花中棲處迷深綠飛時帶淺紅祇
惜香沾羽非關嬌惹風回看意不盡猶是戀芳叢

空梁落燕泥

金閨春色早玉闌芳信賒人歸翻後燕淚盡每先花戶
暗香泥積梁低舞影斜不作雙飛去東鄰王謝家

張仲讀書吳山

輟養辭南陔駕言邁西郭問子將何之避喧謝羈縛堂
間豈不懷雲林諒有託風叩支闕清月鑒董帷薄披帙
就長明靜夜靈花落羊亡屏意筌猿定啟心籥幽谷聞
鳥鳴澄湖眺魚樂霞綺雜烟絲桃柳互紛灼時枉塘上
篇日積丘中作焉得奮羽翰因君適寥廓

初發京口

少年慕攀鱗千里輕徒步
媿匪登廟姿亦謬臨軒朝
躋赤墀塗夕騁青門路
寧知世網嬰遂為儒冠誤
昨浮湘江還願守箕山卧
不勝戰者勞心跡兩乖忤
解纜指廣陵眷戀未能渡
興歌矚流波庶幾照情素

秋夜偶作

晚歲絕外牽懼悰寄所適
皓齒發新聲蛾眉矜故色
變態逐情生羽商隨意易
冶豔詎有央靡曼信無極
歌方

一再聽行期三五夕淫雨忽東來素輝乍西匿金尊悵
屢空玉趾邈難即露砌寒蛩鳴風窗起歎息

秋夜把酒對月

宋生陳九辨陸機歌百年悵茲清秋日聊使幽懷宣矯
矯歸雲鴈嘒嘒含風蟬摧芳委朝露俄景流夕川鱗運
有代謝薜榮無常妍始知行樂貴何用居情牽長夜思
秉燭新月正登筵金尊泛綠醕寶瑟絙朱絃商歌當棗
下楚舞出花前餘名焉足藉達生乃為賢

仲秋之月諸晷燕私風月雖佳雲雨或間

良辰信具美清夜永為歡明月已幾望華彩流雲端廣
庭置芳座高會列盤餐但云杯行緩不惜露下寒情來
感今易跡往戀昔難一聞關山曲猶似別長安

敦賞每卜夜行樂聊及時秉燭且不寐待月宣云罷鱗
鱗玉葉薄皎皎金波遲高臺臨窈窕迴塘生漣漪載歌
蟋蟀唱復詠鵲鵲詩清輝一以鑒素心同所期

嘉月有餘照歡晤無限情寵弟載旨酒要我坐華楹

齊英復萎桂滿輪乍傾忽忽愁霖至瀏瀏悲風鳴圓缺
遞相運明晦焉足驚太康靖往訓知止宗令名

秋宵酬子安兄作

清夜游家園眷言懷丘壑素月升員靈千載共寥廓始
出東南樓俄頃西北郭華燭滅蘭堂金波蕩羅幕雖過
二八時光彩紛綽約商歌正流響魯酒亦未薄人生貴
適意何為坐羈縛結髮從至今朱顏悵非昨冶服豈常
翫榮名焉足託良會聊具陳麗藻復間作穆如揚清風

粲若敷春萼申意忝惠連何以獻康樂

秋日往梅林莊居

疏公守舊業班生慕常廬薄遊千里外一出十載餘偶
與密親邇怒馬懷所居東林扉尚偃北郭徑始除青山
藹盈戶綠水湛通渠流盼悉成往眷言思遂初將從古
人學乞歸事耕畬顧驚年跡乖坐使情興紆

皇甫濤

不赴郡檄荅子循兄

矯翮思霄翥游鱗託淵沉物類各有適殊塗難並尋豈
伊世網慮擾擾誰為心振衣還東山寢迹棲舊林江海
多風濤舟楫弭川陰無令衝波激但恐歲序侵願言謝
西府谷口有薇音

昌平登陽翠嶺望居庸

漁陽通古北上谷邇皇州縣山帶西日重關枕滄流澄
霞澗影分歸雲嵐氣收陰厓忽成晦夏色驚先秋無以
行邁心恤此烽烟愁伊昔布駿略婉矣幕中籌匪今重

俠士自古并與幽傷哉投筆懷白首何所求

從僧簡經說難

少乏經世姿長逢行路迫何為百歲間坐使千慮積薄
從沙門遊聊與同所適風遠水木華雲興梵鐘夕委叩
愛良託空情藉深譯曾是投石心對爾翻經席迺協支
許懷焉貴軒冕客初服儻有期永願庶可畢

馮惟敏

七里溪別墅

知足始遠辱至人貴自全不羨公與侯所志受一廛吾
家有舊業乃在城東偏一丘藏一壑宛轉依清川生涯
故不常中道成棄捐棄捐從此去一去二十年非無五
畝宅在邑多糾纏幸茲協初心歸我汶陽田

我田無遠近處處緣澄溪朝發巨洋許暮泊野水棲野
航流北陸香稻來東齊宣伊貴異穀美利貽烝黎名山
近村落追暇恒攀躋仰瞻霄漢遙俯眺浮雲低翩翩比
翼鳥乃在太行西終歲不合并激昂飛且啼

東郭次甫

送子遊東岳五月渡長淮誰言獨往人

次甫自號獨往也

中道

臨當乖乘流豈不返何以安予懷一諾重平生三年今
始諧心期在山水所貴敦朋儕秋日動遐思良夜聞高
齋螢火照裳衣蟋蟀鳴庭階何時披素襟一笑遺形骸
馮惟訥

吳郎坐見人餉衣香戲贈

湘君寒薜荔魏帝采靡蕪盤龍連理帶翠鳳合歡襦不

能機上織學作府中趨定知香十里終然傾五都

侯一元

書扇贈王少華

古人有遺言惟白可受采齊紈變蟬雀昭質復安在願
持君子心如月初離海太空無纖翳淳白終不改四海
揚仁風蒼生良有待

侯一磨

和家兄南塘樓居書懷

人意各有適自得貴不違潛蚪本淵媚冥鴻入雲飛自
是愛芳草非關薄紫微南塘山水清可以築釣磯曠野
一登樓青村四作圍出郊甘離索高齋保玄虛日夜起
棹歌處處見樵漁野老多農語東鄰聞讀書避地翻近
人臨潭非羨魚當知陶晏意奚必廛市居

高岱

感興

天負不中規地方不中矩人生天地間安得無齟齬仲

尼屢放逐顏回苦貧窶賢哲不偶時古今那可數達士
貴樂天仁人亦安土勉哉宣令德庶以表千古

鴻雁萬里來翩翩渡彭蠡海燕去何之秋風辭故壘去
亦不足悲來亦不足喜物性各有適景光一何駛運至
疇不興時過亦云止世事俱茫茫靜坐觀無始

何良俊

春日寓懷

東方雖大隱終是漢庭臣如何敢恣肆嘲哂萬乘尊武

帝本愛才寵賜亦殊倫
百金買少婦終歲輒易人
侍從匪孤遠諷說恒見親
當時非不遇傲兀竟何因
我今六尺軀頭白久沉淪
始圖佐明時一官終為貧
比肩侏儒笑爭食雞鶩
嗔放身鹿豕場終勝金馬門
若非速謝去孤意何由申

包大侍御冬日過余城館見貽新詩率爾奉酬
弱年慕大隱中歲棲附郭
試以愜微尚兼用諧勝託
環堵有舊營山楹無改鑿
高樹列偃蹇羣峰羅岵嶂
輕颺披葯房微雨灑菌閣
新竹漸紫苞繁花吐芳萼
春歸競

數榮秋至同
鵲落林卧
閱代謝天
游恣寥廓
遺形偶斥
鷄混迹隨
屈蠖豈無
寰市喧幸
免纓組縛
畢歲矢勿
諉中懷諒
無作包子
臺中彥風
期眇丘壑
暇日訪衡
茅投我游
園作委曲
陶令言纏
綿尚平約
丈夫貴得
意乘時展
明略勉終
天上期庶
果林中諾

何良傳

贈徐伯臣補奉化令

嚴程忽云屆
將子臨河橋
弱柳向微風
黃鳥時交交
感

物傷余心申爾以久要雖有盈尊酒何以永今朝徘徊
意不極揮淚發長謠

金大輿

與文源朱二過溧陽道上

侵星發徂輶悠悠即長路家人前致詞問我將焉赴躬
耕苦旱乾何以資朝暮衣食事奔走晨寒犯霜露楓林
號夜烏宿草棲寒兔輕烟動墟里崩沙依淺渡悽悽浮
客心黯黯長天霧逍遙思孔桴蘧落嗟莊瓠去去返蓬

蒿脫粟安吾素

路岐苦奔峭村舍多蕭索遠水明石渠疎雨散林薄唧
唧棲鳥喧澹澹油雲漠顏陽即主人野飯開山酌窮途
賴所歡言笑解寂寞丈夫江海心何事勞羈縛弭棹息
遠遊長歌畊負郭

塘中亭子初成

抱僻愛丘壑緣厓築幽居雖無墁堊工清曠情可舒陶
子樂容膝諸公甘草廬達人貴適意豈必輪奐俱山桃

發當戶岼柳垂前除青柯集鳴鳥碧水浮游魚禾黍被
阡陌鷗鷺戲菰蒲高天豁朗霽和風飄輕裾朋徒時枉
臨命僕具園蔬一觴自斟酌清言常晏如悟彼蟋蟀詠
逍遙百慮祛

李攀龍

錄別

秋風西北來蕭蕭動百草蕩子無室家悠悠在長道紅
顏能幾時棄捐一何早對客發素書零涕復盈抱上言

故鄉好下言故人老

集張使君別業

清河迅寒流金輿杳空翠
秋氣下高原蒼然西北遇
返照散疎林蕭條煙景異
零落復佳期茅茨况幽致
握手平生人笑談出往事
舊遊數子盡風流吾黨備
千金抵白髮一醉滿君意

答寄俞仲蔚

太乙貺漢德名駒生渥洼
赤汗霑青雲長嘶挹流沙
飢

翫玉山禾渴則飲其涯翹尾以躑躅駒駝相經過不願
游閭闔况乃服鹽車世豈無伯樂垂耳奈我何天子發
素書使者出蹉跎駢駢十二閑駕馬常苦多雖有千里
姿羈絆非所加

集開元寺

流陰拂層岑返照翳深谷古寺入蕭條迴巖抱幽獨梵
影淨香臺鐘聲殷石屋絕壁棲禪誦懸厓下樵牧秋花
雨還瘦老樹霜逾禿寒泉可瑩心白雲况極目登臨客

自佳搖落時何速
疏色蕩腥羶苔光清
簡牘新詩發神秀
舊遊耿初服歸來
杖屨便老去煙霞
伏高城出睥睨
燈火通林麓言旋轉多興後期此同宿

古詩

孟冬風已厲攬衣有餘歎
獨宿知夜長遠客知天寒
河漢直雙闕皎若素與紉
黃鵠從西南孤飛正漫漫
一鳴緩中帶再鳴沾玉顏
遊子不可聽令人中道還
所以生別離慷慨亮為難

王世貞

碧雲寺泉

蒼龍戢其首日夜漱寒玉助爾松風聲借之竹色綠時
從齋厨下泠然注空谷自愛穿雲多焉知出山濁一酌
聆斯言徘徊愴心曲

薄暮發古城即所見志懷

一水天未明餘霞亂相射錯落披金膏噴流萬瑟瑟長
嘯招天風為我馭海席吳越拍掌間黃花正秋色

行淮揚境汎覽社即事有作

湖波二百里元氣何茫茫天隨一線盡日起萬鬣張無
論南北風但見來往檣炯若青銅鏡掩映美人妝驚鷗
散明玉唼藕奪冰霜纖鱗一入手大嚼無餘觴冥見漁
火微靜聞稻禾香榜人前後歌語語子夜長人生劇可
樂何如近故鄉

暮坐離資園即景

高齋語來暝偶爾成幽憇崢嶸石色古窈窕川流細新

月在疎篁娟娟自相媚顧此羣籟寂恍焉覩真際欲叩
俄已忘呼杯但成醉

馮子仁先生挂冠長君咸甫赴公車賦此贈別

馮唐厭郎署拂衣卧滄洲有子字王孫頗與史長遊冥
志越三墳英風隘九州飄然赴公車甲第焉足酬三語
司空掾一疏富民侯鄙意稍不然良玉戒暗投不覩長
安市談笑生戈矛桃李駕春風獻態不自羞憔悴離根
株零落委道周竊窺松與柏偃蹇若潛蚪鬱作清廟材

竟為匠石收出當承八柱處當傲千秋

早起

初月將曙輝亭亭淡空碧微星漸以隱存者猶歷歷玄
蟬乍停號宿羽時鼓翼時至鐘未鳴山僧嬾成寂

暑嬾

一暑生百慵一慵百事簡偃息衡門下悠悠夢初轉亭
午鳥倦啼槐陰自舒卷時有涼風來冷然忽稱善勿謂
羲皇人此意知者鮮

發自義興由東九抵湖汊一首

揚舲出荆溪溪流浩無盡疇謂當蕭辰青山吐餘潤驚
鱗發潛響振羽橫遙瞬時見空翠來焉知余榜進喬木
生午烟場禾表秋信茶叟携筐歸行歌渺然近顧余若
有適壺漿當為引明發從此辭中宵衣時振

入林屋洞天不能竟有述

林屋第九天中藏黃金庭北穿丈人峰西達峨眉陁垂
滋結乳玉穿溜散空青崕呀藏石門噌嶺吐神鉦是時

秋始暮積潦尚澄盈雖負褰裳勇蹕擊中不勝邇慚孺
子託遠媿靈威生誓欲偕青童飈輪探窈冥千載靈文
出聖治冀可徵

王世懋

初夏田家

本愛園林居遂與塵世隔欹枕過烏啼初陽在簷隙攬
衣臨前除遊目恣所適藹藹千樹交紛紛里煙白清渠
已新苗高壠尚餘麥雀乳深茅茨魚防間雀澤野夫荷

鋤語小婦當窗緝周覽物候齊
憺焉忘朝夕薄暮池上歸苔痕亂深屐

至漆塘絕頂見太湖

泊舟閭門道汀渚生夕曛嚴程指明發展側及宵分雞
鳴舟人語柔櫓聲相聞浩渺煙波間鷗鷺自成羣輕霞
冠初景遠巘斂餘氛日出照蟾蜍髣髴若織雲停撓止
宓妃擊鼓下湘君情境自怡適寧知行役勤

夜泊芙蓉湖翫月

今宵仲冬月忽發滄洲興進艇延素光開樽坐青鏡霜
含煙樹遠塔挂寒山靜何處洞蕭聲魚龍夜深聽

謝榛

雜感寄都門舊知

瞻彼終南山松蘿幽且邃中有一真人超然遠朝市手
握神龍珠照夜光自祕石苔積古色斗室廓天地澗泉
為誰清蕙花為誰媚西望徒遐思書札何由寄嗟哉處
流俗冥心可無醉鷓鴣為家祥鳳鸞非世瑞奈何君子

交中道兩棄置不見鍼與石相合似同類文字生瑕疵
鄧林紛葉墜有家早歸歟獨歌以卒歲歲寒元氣塞偃
仰待春事

雨中宿榆林店

涼雨何冥冥黑雲復浩浩山行夜不休破屋臨古道數
口遠相投蕪穢不及埽園荒無主人馬散齧秋草席地
即吾廬餘生聊自保隔林乞火回酌酒慰懷抱反為妻
子嗤寧如在家好

梁有譽

秋懷

夕霽涼氣發曲房藹餘清金風被蘭茝白露浩已盈密
林謝陽彩叢薄墮芳榮迅商無緩調征鴻懷苦聲物候
既易感神理固難名漢陰甘濯園鹿門事躬畊金張逐
丹轂王貢彰華纓由來事不同各以性自營伊予秉微
尚恬曠諧夙情柱下明守雌漆園持達生緬懷昔人訓
煩囂祇自驚

遊白雲寺

崇岫控越徼，巍鎮峙郊甸。率律億劫餘，迢遞百里見。疎
嶺何岑峭，楊林鬱蔥蒨。峻擬玄天平，俯瞰海日炫。化城
架層巔，拂策陟遙峴。逢槎舊術迷，遭石新磴轉。始至嵐
陰豁，暫息厓光顯。露翳若木莖，風墮曇花片。鳥啼谷互
荅，竹亞露猶泣。沖襟挹恬寂，素想協遊衍。靜惟迦葉智，
默遡龍樹辨。十喻總歸空，六塵原不眩。清朝意蕊凋，縞
夜心蓮現。歲月紛遞馳，棟宇幾遷變。鶴往臺草荒，龍去

井泉淺刻桷鼯鼠啼雕梁蛛網罨感物置安排看雲悟
舒卷結桂緒方遙攀蘿情莫展景協賞為美慮澹機自
遣願總塵外轡謝此區中戀

詠懷

心星轉坤維芳榮遽銷謝玄蟬號樹間蟋蟀吟幽榭商
飈蕩陵苔物性隨時化瞻彼孤飛鴻遊戲清瀾下霜霰
既已違淒藻何雍暇微禽尚有適而我獨悲咤智士惜
流光哀歌達長夜愧無魯陽德何以迴羲駕

明月鑒重幃涼風吹綺疏佳人揚清謳顧影傷離居
別黃鳥鳴條忽秋蘭舒繁華不再至歡樂寧倩餘
迨迨牽牛星萬古恒不渝所思杳天末日夕增煩吁
秦女善鳴箏趙女亦吹竽箏竽豈不哀不如琴瑟娛
織縑常苦劬嗟哉織作勤淚下沾羅襦

燭龍騰遐輝離照亘天衢室隙受餘光徒能耀一隅
物理固殊鑒各隨賢與愚楚客倒滄海提携得明珠
重寶不見賞抱價增煩紆掩袂卧空谷孰知中所須

昔遊黃金臺酒酣卧燕市哀歌傍無人泣下擊筑子泰
谷生悲風易水何瀾瀾豈無英雄者翻覺霸圖恥白日
忽復易脫冠藝粉梓良覲邈山河撫劒中夜起

雜詩

圓象無停晷四序迭相循灼灼春華敷忽委埃塵候
蟲善審時鳴鳥常司晨如何建名士遲暮多苦辛衝波
鮮安舟岐路恒摧輪順風響易遠却行難及人鐘鼎鐫
峻功竹帛垂逸民靜躁雖殊域德業終同倫慷慨感中


情高駕良可導

送傅山人遊羅浮

仙山矗遐陬，蘊竒信靈造。
掩靄蹴重溟，巍冠竄昊陰。
室引陽輝霧，谷通霞島玄。
溜澤難枯炎，林蕊還早故。
鼎無留丹煮，石有遺老神。
境誰能躋玄，蹤爾方討祕。
檢洞中尋塵踪，雲外掃陟霄。
塞若華憑厓，掇朱草吹萬固。
不
同得一以為好，嗤彼蜉蝣士。
夸毗喪其實，何當榮茅龍。
吸景滌幽抱。



御選明詩卷二十八



總校官庶吉士臣侍朝

校對官檢討臣蕭九成

謄錄監生臣傅瓌芳

欽定四庫全書叢要

集部

御選明詩卷二十九

詳校官原任主事臣李斯咏

欽定四庫全書薈要卷一萬八千五百二十九

集部

御選明詩卷二十九

五言古詩十四

宗臣

秋夜省直

驅車即高局秉燭照清池
冉冉見芙蓉白露被華滋
仰見明月光三星燦以垂
蟋蟀鳴重階繁聲一何悲
感之長歎息嗟此陰陽移
鹿鳴思野草宿鳥懷故枝
人生貴

適志羈棲亦何為行行返舊服去去清江湄此意良未
申空令達士嗤

擬古二首

冉冉江上蘭燦燦江中芷我友遠行役駕言適江汜江
汜波浪深歎息從中起昔別春卉敷今思暮飈紫遊子
不旋歸浮雲日千里

驅車事行遊巖畔見芳草芳草綠以萋揉之遺所好徘徊
豈云宴悠然傷我抱不畏芳草歇畏此關山道關山

阻且長客子行將老

懷謝山人茂秦

驚飈動四野白露下前除攬衣起四顧悠然懷所思
所思亦何在乃知漳南居朝設穆生醴夕曳鄒陽裾西園
事行遊飛蓋列應徐近者日以親遠者日以疎不念同
心人所須在音書音書不一寄何以慰躊躇三復游燕
篇躊躇聊以舒

寄子與

清晨發東郊蘭蕙何灼灼採之遺我友我友在京洛道
路邈以修羽翼誰能托但恐霜露垂馨香日零落

楊氏園亭餞別謝榛

離思忽超越逍遙事行遊散步過華池芙蓉夾芳流悲
哉蟋蟀鳴淒切動我愁凝霜莽零落明月澹飛樓感此
歲華暮耿耿生百憂居者不可去行者不可留去留兩
不愜何以慰綢繆

留別子培舍弟

驅車上河梁顧瞻舊鄉國倉卒骨肉親彷徨動顏色子
亦竟以南予亦竟以北本是雙飛鴻胡為乖羽翼送子
從此歸涕下不能食子其從遠猷慰我長相憶

秋夜寄陸子和

攬衣步前除白露被高桐枝葉并零落大地回悲風明
月起夕愁東壁鳴寒蟲四時一何速天地無終窮嗟彼
客遊子終歲常飄蓬十月寒無衣薇藿腹不充何事不
歸來孤此青桂叢欲寄尺素書不見雙飛鴻

徐中行

得于鱗書

伊予河梁別楊柳方依依分手幾何時蟋蟀鳴庭幃商
飈率已厲白露沾人衣感時懷同袍中心愴以摧不惜
故人遠但傷知音稀長歎謝流俗高卧掩重闌忽逢雲
中翼開緘見音徽殷勤骨肉言夙昔歲寒期臨風再三
讀慰我長渴飢喜極復垂涕願隨黃鵠飛

春暮將赴汝南廣川舟中寄懷京邑諸遊好三

首

昔來嚴霜零春陽忽已暮盛年不再逢嘉會豈常遇何
況凌雲才藝苑振高步眷予失羣羽不吝千金顧留連
曲水游感慨河梁賦嫵婉能幾時俛仰即岐路車馬盈
道旁孰測心所慕冀闕何咎堯浮雲日馳騫斂轡臨長
河徘徊不能度

浩浩黃河流冉冉白日晚驅車渺何之南遊洛與宛五
馬道踟躕十步一顧返言念同懷人亮節不可諛談天

碣石宮置酒華陽館高文敷瓊瑤清歌命簫管携手遠
追隨思情一何婉居者弗克俱行者日以遠春暮無歸
鴻何由寄情款

黃河多悲風白日廣川陰驚沙蔽天地方舟猶滯淫躑
躑將安適曳履援鳴琴一為清商曲灌木俱悲吟知音
一以隔離思故難任在近多遺遠日月易浮沈伊余歲
寒契莫忘初別心願言厲高羽千載垂詞林瑤華倘可
嗣引領伊川潯

吳國倫

泛九曲溪

林端日已歇心賞未云足言携武夷君泛此雲溪曲

秋夜同周子徵珠江泛月

良夕豈易逢奇遊夙所慕
暝陰薄層城浮雲莽相赴
須臾明月生澄空皎如素
縱艇隨輕潮披衣下纖露
髮鬢海市通相將天河渡
中有弄珠人亭亭出煙霧
微颺動鳴環綽約清虛步
手裂雙扶桑化作千琪樹
幻景良若

斯脩然啓冥悟

夏夜偶涼即事效梁人體

炎方雨忽霽夕閣涼如秋星雜簷螢落河連枝鵲流榕
陰滴衣桁荔色炯簾鉤月擁玉壺上天偕珠浦浮輕颺
動白苧密篠鳴蒼鳩拭簟冰初合提紈雪未收不寐憐
光景長吟步斗牛山煙微入幔海氣積為樓病當三伏
起老作九真遊江漢渺何許關山悵悠悠

張佳胤

詠懷

毒暑不辭鍛嚴冬尚為漁裘葛有本性生事因其居伊
予觸世網轉與青雲疎一謫孟諸野再遷首陽且素位
守明誠窮塗豈歎嗟貴者日以貴寧得辭勞勛賤者日
以賤庶幾遠禍樞

立秋簡徐子與

涼風厲商氣颭然驚早秋白日下圓景大火西南流年
序忽不處陳蔡難久留案牘繁以迫胡為日綢繆洪河

逝如斯草蟲夜啾啾凌厲緬千古遺則懷前修女蘿挂
喬榦玄蜎吸深湫託勢有崇卑適志其良謀

三甫入渝予不能謁承枉書問且督南征並訂
郢都之會而寄以詩

良時罕再至嘉會復何如孟冬厲霜氣蓬蒿沒敝廬興
言念友生抗旌向巴渝便欲往從之山川鬱盤紆感茲
綢繆意遠及銅梁書加餐字未畢殷勤勸脂車漁樵計
已定樊籠日愁予聞君下夔子目極生躊躇孤懷入大

江萬古只東趨郢歌有白雪期我獻歲初醉罷陽春臺
然後策驪駒

寄題永嘉王陽德陽湖精舍

招隱豈在深智者秉微尚伊人卧陽河幽襟謝塵鞅丹
霞遞崇楸南北兩鴈蕩萬象厲景光凌緬非一狀鷗夷
任所之滄浪發高唱扁舟就何時逝將剡川放

俞允文

登毘廬閣

古閣秋氣清千里滅煙霧連山開雲秀頽城斷行路殘
僧戍荒齋寒鳥落高樹中多故人情停杯日空暮

秋懷詩

涼風金石勁悲氣壯隆烈晶宇蕩暄濁輕脆競摧折松
柏有殊性遂與衆卉別是時陽鳥至叶嘯霜中月力盡
羽翼單欲奮不得發何以表天骨沈吟猶未決

園居

窮居寡儔匹園廬有餘清落葉覆荒池疎林映高城野

田刈獲盡霜畦蔬復登寒月無密影中夜露氣凝是時
囂煩息沈思方入冥沈冥乃道真一悟還自驚

遊聖像寺作

野寺始獨到新晴欣夏涼芳篠青叢叢竹陰覆房廊寒
棕剪高翠過雨桐花香川梁通煥景林殿疎夕陽耳目
暫清暇都將塵垢忘何時來永棲放跡無何鄉

晚晴溪上

暑雨池上歇行漾菰蒲清涼陰滿庭戶新雲依樹生天

風泠然來飄飄欣體輕始悟幽事愜彌令茲意平

送王明善

并序

王明善屢試不合嘗鬱鬱不樂遂以乙卯六月北
轅朔都以展所蓄積且將復觀塞垣求古興衰之
所由余謂以彼其才而偃蹇若此則雖君山放逐
亭伯流離殊未足增其憤懣也因寓於詞以述乖
離之思云爾

威鳳集珍條積風限高翔巨鯤志江海尺澤焉足量懿

茲中林士敷文聊頽頽塊然寡徒偶舉足蹈峻防伸眉
竟何階念之鬱中腸抑我同心歡乖離越他鄉他鄉三
千里道狹草木長白露浩已盈但恐霑衣裳

送葉伯寅遊南都

朝日揚素景零露泣盈條歸鴈辭碣石嗷嗷厲曾霄念
子遵舊都整策陟巖椒北眺窮朔垂東瞻越江濤崇雲
象山岳雙闕鬱宮堯過彼雙闕間冠蓋相遊遨四節隨
飈逝茂時乏嘉招駿驥棄不收踈足有餘驕所期必鴻

舉齊轡羣龍朝非子良見睠豈復繫場苗信心慚中賞
沈吟結清謠共期玄冬月歡讌憩林巢

送梁伯龍游楚并寄周水部

浮舟入楚江浩蕩千里豁況值清秋時逸興不可遏雲
來巫峽長木落洞庭闊故人渺何許引領向天末

盧柟

酬謝逸人四溟

并序

山東謝榛茂秦嘉靖中以能詩為趙王客居鄴邸

嘗遊跡燕趙梁宋間與余相知辛丑歲余坐誣繫
濬獄則杳然莫知出處近有人自宋中來傳四溟
詩集讀之乃茂秦所為者中二絕句矜余極冤擬
之禰衡李白之倫夫禰李詩賦懸日月彼雖死斯
文猶存於世若余發跡既隱又罹重法有說如山
誰肯為余傳哉因作詩三首用荅其意若茂秦之
得見與否無容心焉

曹思弄文翰歌詠鄴中詩招遊七才子俱好相如詞君

隨鳬鴈圃應教鳳凰池
聊拂清霞賞蔚茲瓊樹枝
胡為泛滄海令我長相思

謝客恣霞想揮手絕人羣
朝思北燕里暮宿大梁雲
海日照舞席澄江瀉清瀆
遠遊憩靈境奇節冠秋雲
黃鵠思煙侶長鳴向夕曛

李白謫仙才襴衡賦鸚鵡
絨愁投夜郎掩淚赴黃祖
殺身揚綺芬高名播千古
天摧白龍鱗雲斷黃鶴羽
感此遠謝君沈吟望梁父

重寄李子理

麒麟出魯郊商鉏為不祥向非孔仲尼何異犬與羊所以路傍人按劍嘿夜光近時青雲士豈無魯連子氣節苟不申甘蹈東海死世人聞此言棄之如敝屣投君勿復道北風吹易水

贈友人歸別墅

綠楊漫垂舞擺動春風情吏役甘作苦瓜期思田縈尋溪觀游鱗出谷聽流鶯別有漆園客長歌懷友生

適金陵登魏武讀書臺奉別李覺齋丈

魏武建雄圖虎視何壯哉
祇今霸氣盡空餘讀書臺
登臺覽四野蕭瑟悲風來
飢鳶獵平楚寒狐鳴城隈
林木鬱蒼然煙霜日空摧
咄嗟此山川千載埋雲雷
我亦慷慨人與君遠追
陪酒酣拂寶劍肝膽歷然開
遙望南溟間鯨鯢滄波頽
相顧起叱嘯坐使風雲迴
楊僕擁樓船聲名冠崔嵬
富貴吾自取他人徒驚猜
投鞭自茲去千里騎河魁

叙隱

仙槎隔溟渤，天漢嗟無梁。
桂樹含丹葩，瑤草限年芳。
我生無羽翰，翻飛不能翔。
攬衣步宵月，撫劍臨秋霜。
欲問嚴君平，此事何渺茫。

送顧聖之游楚時余將往金陵

春山送行子，春草惜離觴。
不盡孤雲意，徘徊古道傍。
望金門曉，悠悠郢樹蒼。
此中滿高詠，遲爾寄江鄉。

雜詩

高樓有佳婦窈窕青雲端左蔭綠桂枝右紉芳澤蘭臨
流戲珠浦拾翠游芝田蛾眉衆所嫉蘼蔕翻見憐棄捐
蓬蒿中誰來希令顏徘徊歲云暮拂衣聊長歎

秋日奉別王元美比部還京

爍爍天上星皎皎巖際月蟋蟀感夜吟涼飈遲晨發山
木既云蒼江楓亦已脫遙望百里間茫茫但寥闊鳴鴉
鳴園馭虎豹步庭闕臨路別所親悵然增華髮安得瓊
芳枝慰我長飢渴

李先芳

紀行

驅車指京邑嚴冬北風急辭親何草草寸心亂如棘晨
起踐霜露日暮不遑食出門即他鄉道路安可極遙望
還山雲撫劍長太息

明月皓如日徘徊照我衣僕夫守嚴駕客子獨掩扉滅
燭撫高枕愁來不可揮丈夫重奇勲榮名世所希願同
黃鵠志施翮凌風飛

鈴岡

西行多名山遙遙望鈴麓夕霽淨嵐霏千家煙樹綠叢
桂發幽香寒泉響深谷容與蕩輕舟前波飛屬玉

蒙山

晴嵐搖旦景白雲條掩護道逢山下人借問山中路石
門幾許深龍潭竟何處長松不可攀高鳥邈焉去

郊送于韶馬上作

端居苦無悰出門見芳草遊子久不歸送客長安道垂

楊夾御堤初日正杲杲空聞黃鳥聲間闕為誰好

早起

嬾朝每晏起先期戒僕御張鐙斟濁醪雞鳴九闕曙天
寒霜斷肌霧重鳥迷樹居人各掩閨匹馬自來去

擬古

青樓臨大道初日正杲杲感君桃李年使我懷春早佳
人念良夕誓結同心好磐石轉有時華池多芳草秋風
薄天雲一去跡如埽篴篴池上魚翩翩籠中鳥性情本

非宜况復傷懷抱

吳維嶽

信州同汝成遊南巖寺用李崆峒壁間韻

幽哉巖裏居戴石世所罕源泉一勺多香煙終日滿停
杯岫雲遲解帶松風緩緣崖鹿豕蹤復與同人踐

歐大任

汎湏江至修仁水尋范雲飲水賦詩處

陸陟心苦艱江行意超忽揚舲恣擊汰理榜欣乘筏昔

聞范內史於焉自怡悅賦詩散鬱陶飲水辨清渥今游
屬暮春遠放遵南粵三楓睇已遙五渡嗟應沒爰思雒
雉馴尚想甘棠茂命駕稅山椒弭蓋依林樾明霞帶遠
巒瑞靄屯崇碣拱薄粲朱櫻原陵苞綠蕨感茲時物遷
懼爾芳馨歇代更道豈殊事往迹空揭淒淒懷古吟心
賞不可越鵠夷迴泛湖子年悵懷闕采蘭向中洲眷此
何由達沿洄發棹謳愉樂陶嘉月

十四夜元白維敬見過

曖曖天宇豁良夜皎如練鏡彩未盈規清輝遠彌見先
臨太液池却麗昭陽殿須臾出漸高厯厯指燕甸零露
浥金莖嚴更促銀箭登樓枉嘉賓鳴佩總時彥列坐引
濁醪行廚媿豐膳盍簪既非偶明德夙所眷共舒南渚
情寧羨西園讌鄙劣謝久要期爾迴光眄

黎民表

游仙

我思忽不愜藐然隘中區凌山度瑤碣肅駕自雲衢遨

遊清都闕神姦吹我軀上帝垂藻旒羣后驂龍趨羨門
進仙藥王喬授玉書餐和鍊真魄精神遊六虛自握無
為寶年壽安足虞

濯足紫泥海晞髮朝陽阿雲車載玉女皓齒揚清歌參
差麗霄漢玉麟隱相和駕言憩玄圃貽我瓊樹華光儀
忽以逝茲意成蹉跎宕宕閬風岑汎汎蒙汜波仙才諒
非偶浩歎將如何

山林非所託所思在神州寓目八紘外經過華池幽神

光颯然至青鳥從我遊靈妃奉玉觴清謠自相酬歡娛
未終夕曜靈不可留山川負綿邈白雲良悠悠安得不
死藥千載復來求

同丁戊山人遊白雲寺

流觀徧炎隩結賞自員嶠積陽熙層厓凝陰豁林杪雲
構何屈屨乳竇自窈窕瀕洞出谷雲淵渟瑩神沼稍疲
暫憩石選勝益躋表欄楯寄躑跂軒窗瞰深窅猛簾發
鴻音寶輪晃餘照龕以曇花覆階將蕙草繞詎謂劫灰

餘遂成夷原燎棟橈芝菌生瓦圻鼪鼯嘯金薤剝石幢
永藥遺丹鉅惠遠豈復招巫陽不可叫蕭辰命良傳蘭
觴展奇眺感茲玄運徂念爾沖規劭關河閔舟楫雲雨
乖言笑潛蚪媚煙霄冥鴻避矰繳勉敦谷口盟無貽北
山誚

予告出京師貽同好諸子

雙鳬戲中沚羽翼相因依眷言二三子疇昔同裳衣
婉未及終雲雨當乖離往嬰鵠原戚今懷機杼悲貞悔

難具卜榮賤同一時衆人各有營疇能恤其私君子重
明義申以皎日期采擷異葑菲以報瓊玖貽

魏允中

望山懷張仲友山人

宿約杳不遂棲棲東岱麓官舍鑰重門一月成幽獨日
出步小園日暮空齋宿永言懷故人漳流結茅屋昔別
樹無花綠陰生夏木君常兒女嬰余且浮名逐舉頭望
名山悵然傷塵目出處決何時早欲脫羈束却向此山

遊逍遙雙白鹿

舍弟東視海上諸郡余西歸

共被復今夕分携在明朝子車向北海我馬投西郊疾
塵蕩山郭密樹迴河橋相望忽相失憂來不假招芳華
色黯淡鳴鳥聲蕭條加餐縱努力何以慰寂寥

胡應麟

雜詩

曜靈薄崦嵫光景忽已夕圓魄猶未升明星爛然出寒

蛩號我前蟋蟀鳴我側涼風起庭戶樹木何蕭瑟佳人
期不來延佇空歎息寧知三歲心為子長惻惻

秋日偕同志遊金華

屈子歌遠遊尚平有遐慕顧謝青雲人言尋赤松路歷
覽窮幽深冥探愜情素澗壑捫欽岑林巒涉迴互崖傾
黃葉積谷轉垂蘿護高峰散餘靄峭壁屯寒霧娟娟初
日昇隱隱微陽暮長謠欽昔蹤獨往懷蹇步慮由忘物
超道以遺榮悟迹契容成公神交子支父徘徊北山文

惻愴淮南賦睠彼丘中人迴飈對巖戶

徐獻忠

俞氏水樓

故人江樓月照見千里心遊子未言歸清光被滿襟西
陵隱簷際南湖澄夕陰持杯向木末捲幔對遙岑悵然
不能去徒令江水深

孫宜

湖上

湖上秋色半經年吾始來繫舟泊磯口聊訪垂綸臺水
光蕩菰蒲鷗鷺相與回沙明白石岸日麗青霞杯漁父
煙艇中棹歌聲相催片月出遠空蒼茫碧雲開北斗插
波落天河低野迴露下涼吹生颯然動秋懷杖藜謝鄰
叟斗酒明當偕

十三夜月

良晤既非易佳節亦復過今夕非昨夕光景忽已多霏
霏失玄霧黯黯增金波昔眄猶室隅茲升眇庭柯當扉

萬象啓側戶三星羅蕭爽候愈寂沈冥夜如何興言悅
至賞眷此成清歌

焚香

結軫倦久疴嚴裝理前遊山行稍云疲水宿良所由弭
棹臨別浦揚舲逝安流波迴路曲折雲霽天沈浮霜荻
響近渚風篠鳴長洲沙翔去來驚岬並連拳鷗澤蘭晚
漸垂江莖秋始柔導嶼乍離合凌飈屢優游擊楫情已
乖乘槎興將侔即此締造盟抽詞贈同舟

行視別業禾稼作

徇祿返塵軌卧疴遂幽垌為圃竟不習學稼鮮所明薄
田委僮僕嬾性謝經營春陽始云改夏序亦以征輟翰
越城棲振衣事郊行既暢景物麗復感禾黍盈雲葉被
畛秀風花覆阡平修渠濯細流佳實播初馨堅好類周
穡耗蠹殊魯螟利婦足遺穗築塲喜新晴澤忝我私及
秋荷今歲成麤糲甘自嘗飽煖奚更營且免洛陽歎聊
結杜曲盟

強仕

詠向長

子平謝累辟雅志在隱居乏食或有饋取足反其餘讀
易深自悟人世等蘆廬謂貧富不及謂賤貴不如勅言
婚嫁畢家事無關余同好有禽生肆意相與娛五嶽游
躅徧高風映簡書

詠王霸

儒仲有清節始亦赴徵命造廷抗高辭不肯臣萬乘歸

來事躬耕蓬蒿掩門徑翩翩故人子相過容服盛一念
兒曹羞客去卧不應賴有賢婦言不失初守正嘉遜遂
終身清輝兩相映

詠梁鴻

伯鸞古賢人乃在杵臼間夫婦共守志逃名入深山淒
涼五噫歌東出辭帝闕齊魯復荆吳長往遂不還為傭
豈無勞顧已少外患終葬烈士旁高風邈難攀

郭本

結屋

貯木二十年一屋未必就風雨日薄蝕土花起皴皴捐
棄弗忍言黽勉始結構因循復三載石雨穿寒溜枯棟
三兩橫客來不敢留人生須蓋藏輾轉事飮餽握粟出
經費廚人生怨詬自笑鳩為巢未了先白首休哉孫五
郡去官借車廐至今清白聲猶不媿屋漏

過以禎西莊

杲日明西野綠蔭連松篁清風徘徊至滿座納虛涼門

窗見鳬繹蒼翠飄風光時聞讀書聲伊吾禾黍場東鄰
有壇杏雨過生微香

郭文涓

遊西山

緬維京國遊夙憶西山勝前期戒朋儕昧爽理征鐙連
鑣出都門散轡遵郊徑厓猶望晴巒迢遞陟烟磴蒼茫
紫翠分參差金碧映雲際鬱層豐風中發孤磬山光足
怡愉池色湛清瀝覺花粲奇馨慧草紛延亘梵影空中

懸經聲榻前聽行恐苔痕穿嘯聞谷響應翠巘屢攀躋
朱闌恒眺凭取適情易酬息機意初稱登臨愜賞懷攬
結動幽興聊茲却喧囂庶以慰蹭蹬

馮行可

奉送景坡先生

寒煙彌宇際朔氣侵征裳有客賦遠遊我心亦孔傷交
知難為別佇立傾東腸執手各躊躇悵望關河梁渺渺
吳山雲風期紆以長願言迅馳驅相依日月光

過文衡山先生停雲館

緬昔玉堂仙高情屬丘壑
梧竹羅庭除文史祕齋閣
欹枕待春鶯調絃驚夜鶴
羊裙書更精鄴架才偏博
神理寄沈冥音容已寥落
我來讀遺文私心竟誰托

雜興

夜長苦難寐薄幃鑑明月
披衣立中庭星漢燦以列
夜分羣動息蟋蟀哀音徹
念我同心友夙昔展歡悅
如何金石交三年傷離別
離別何足恨履行貴無缺
丹青信

不渝在遠逾昭晰蒼蒼松與柏各自零霜雪詎學女蘿
草柔枝相糾結

邵圭潔

對月

秋空淨無氛嘉月照涼宇欣逢此良夜門外即遐旅懷
舊鮮歡悰乘光欲高舉所思况非遙形隔不得語徘徊
孤影邊嗟哉乏雙羽

葉春及

飲陳巽卿宅即席賦得帝字

黃公避秦皇子陵傲漢帝萬乘彼不榮五斗吾何利邇
來脫桎梏麴蘖聊避世田父尚不辭况乃夙同志高堂
敞華筵上客縱橫至日暮飲未休舍坐還席地屢舞倩
人扶歡言答賓戲因思劉參軍荷鍤有深意

鄧元錫

雜言別傅陳二友

羲娥無停轂青陽忽朱明柔條奮翹柯原隰何青青往

者日以徂來者日以榮嗟余至寡劣希聖徒有營邁往
信不力逾覺時序傾我身所以立豈不恃友生奈何同
心侶中道各有程戚戚增紆思薄言寄深情

古詩送王子仁

噓物寧非風風勁物乃戕駕車寧非馬馬疾車以僵百
獸伏騶虞衆禽景鸞凰豈無鷹隼姿搏鷩難為良

別江子

良農程歲功豐凶非所諳良賈經儲積利鈍皆所甘曾

以水旱故棄捐任與負曾以貿易薄棄捐絲與布十年
經世業料理亦有素奈何乘輶輶中達思改驚人生各
有職治職各以勤永誦蟋蟀篇愾然念先民

潘緯

宿白嶽社山中

白社負幽期青山寄空宅偶携林中友重卧巖下石雲
歸忽閉關月出更留客不著塵夢還潺湲響終夕

春日憶山中舊隱

及茲農事候令予歸不閒本無西疇耕為趁東風還舊
廬在林莽樹石繁其間時春方雨餘好鳥聲闐闐門柳
媚柔條蘿徑滋苔斑澗鳴始流泉座對初青山寓目但
成景偃仰多歡顏此鄉能似否寧不思迴輟

吳承恩

對月

人言天上月中有姮娥居孤棲誰與共顧兔銀蟾蜍冰
輪不載土桂樹無根株紛紛黃金粟歲歲何由舒一閉

千萬年玉顏近何如相違不咫尺照我闌干隅一杯勸
爾酒為我留須臾

曹大同

秋日田居

屏居謝人徒朔風吹寒雨遠樹既盤紆溼雲亦交互愁
鷗戀故林隱豹諳長霧幕厯川光昏蒼茫野火聚耳目
暫無擾閒情託豪素拙訥罷干時賞心於此遇飛光忽
我道咄咄歲云暮眷言採三秀顏齡儻能駐

遊仙

有道百靈初無名萬物始九氣煉中和三元謝甲子化
昇隨感遷清越徹表裏玄圃御斑鱗丹丘乘赤鯉左拍
浮丘肩右躡羨門趾山成數寸塵海無三尺水長嘯宇
宙外超然得不死

孟思

秋夜期友不至

西風散秋聲搖我庭間樹月寒草露光山靜星河曙林

鳥相向啼昆蟲紛若語美人期不來幽客徒凝佇

周沛

別顧孝常

馬離鳴故羣人去懷心知憶昔邁君始意氣如連枝如
何條離別旦夕殊歡悲滔滔斯世士孰與吾心期言念
古之人同心不同時同時復睽隔何用同時為

冬日

滯靈迫冬日山川掩重岡引領望郊邑遠樹鬱蒼蒼浮

雲馳白晝迅風激衣裳中野少逢人乃見鳴鴈翔我有
一束書因之以遠將其多至萬言其音悲且傷終以重
見辭翩翩各一方攬涕下長坂躊躇不能忘

張之象

謝臨川遊山

客行曠登覽羈心展遊陟累糧度瑤岑振衣尋石室源
深洞屢迷徑險巖逾密重林散輕霧絕壁映初日鳥鳴
識節變草綠知春及天桃始發溪猗蘭漸盈澤採藥遵

靈丘援蘿入幽谷緬邈隱士居想像仙人宅朝窺鸞鶴
逝夜聽猩猿泣水鏡含清暉松門帶暝色近澗虹文丹
遠峰嵐氣黑雲歸影難留泉飛響易急觀竒道轉遠探
異情未畢候月弄澄鮮餐霞羨高逸適已物自忘達生
賞無極終然得所遣儻值同懷客

春日遊燕子磯

古稱秉燭遊行樂恐迨暮策駕尋名山居然得真趣展
宇開霽旭熙陽斂昏霧雲錦被竒峰水鏡含芳樹眷茲

風日佳開觴藉蘭杜頗懷披襟友諸美難具晤流鶯稍
出谷飛花已盈路暢哉人境外屏跡遺世故勿為京洛
士緇塵染衣素

朱永年

詠懷

南鄰競歌鐘北里吹笙竽我獨甘寂寞守此貧賤廬蓬
戶不掩葦簟瓢常晏如負郭住窮巷門無長者輿彈琴
發雅操誦詠詩與書安神在閨房澹泊思玄虛至人求

髣髴榮名非所須

丘雲霄

思家

木落愁遠山鄉心夜來絕不見渡溪人但見渡頭月高
堂憶遠征妻孥望天末舞衣生輕塵自貽此契闊白雲
起江頭直向武夷沒

溪月初出水

溪月初出水照我清夜堂沈憂不成寐踟躕步寒光飛

鳥深夜號繞樹林煙蒼有懷空自知默默心摧傷

怨詩

江石如龜甲隱隱浮明沙不障東之水偏驚游子查游
子去鄉國長風吹斷霞斷霞只在天游子去無涯泠泠
秋已老飄蕩未還家

施漸

示兒陽得

喟然寘琴書白日閒如此共以蓬蒿身相去南北里高

樓多遠心流雲過如水有意不能言悲來但思爾

晨起行園治蔬

處痾情方愆覽籍亦勞結止跡丘樊間喜與荷鋤列晨
星沐未遑周葺幸餘力夙英始斂華密露若瑩雪螽趯
感離歌鵲鳴及幽月萋萋瓜畔空厭厭豆畦歇觀化有
消虛徵情既伸屈庶幾東陵隱豈伊公儀哲永此藿食
資耕鑿藏吾劣

齋中雨歇自述

高窗晦積雨連晨娛篇帙耽慵情方宜嗜寂意尤密風
柔園條變溜溼堦蔬茁宿陰漸已收幽禽時唧唧隱几
欲忘言斜光透雲日

晚步池上

弄翰乘暇日池上步逍遙寒魚翻在藻落葉亂鳴條流
序忽如此寸心久自要蓬飛定有止意遠不嫌囂常念
沮溺輩躬耕趣獨超

贈人遊蘭亭赴陳山人約

靄靄深竹林林深阻修澗清川流其間懸崖俯可辨春
蘭日以芳風氣日以變君往對山人如逢昔人面

秋日與華從龍俞汝成泛湖上

相携出井邑輕舟汎秋水樵響滿晴山游靄緣原起濯
足湖上流浩思方如此

嚴怡

擬古

采采南山桐十年成一琴製者豈不苦謂世有賞音持

以奉君子不與我同心擬鑄鍾子期家無雙南金

李奎

遊天竺寺有懷謝康樂

秋光澹巖岫入谷聞晨鐘白雲嵌紫芝峰朶開芙蓉林
香晝自結夾道羅長松沙廣草煙薄溪深花露濃梵嶺
鬱飛鷺咒潭降毒龍閒禽互交語道侶時相從久矣悟
空寂齋心禮金容精廬隱暮色蔬食修珍供還憩崖亭
上永懷高人蹤

採藥

山中宿雨過嶺上明霞赤荷鋤入南畦藥苗始堪摘黃
精種未鋤紫芝已盈尺隔水望茅茨還歸煮白石

張元凱

漁父

溪橋轉山徑湖水碧於苔漁舟柳陰下舉網得四腮樵
薪猶未至新醅業已開團團坐妻孥不簪亦不鞵欲要
采菱人西風吹船回簌簌蘆葉響月上潮正來波濤非

云險夢寐良不乖向逢楚大夫言言傷我懷

樵父

偃樹春不起繁條秋彌叢長鑱入空谷厯厯摧枯蓬形骸肖山鬼趨捷輕狙公玄熊夕相避猛虎晝不逢素履往無咎險阻窮能通有時不歸來高卧山之東積薪擬待價沽酒明月中桎梏軒冕者終焉媿此翁

圖山朱都尉過訪留宿草堂中夜不寐情見乎

詞

有客江上來柳下住雙漿身白儼如瓠巨口仍廣顙相
見嬾長揖落魄高陽黨呼兒且沽酒把臂坐草莽十年
交自傾片言心覺爽明霞四散飛長庚獨先朗蝙蝠撲
檐間熠燿行草上涼風西南來刺刺枝頭響下榻不能
寐空庭共頻仰慷慨醉中言何時起李廣

志別

祖道一尊酒涼風江上生楓林一葉丹秋動千山聲星
離越溪水雨散吳王城我昔游燕趙居人送我行今我

亦送客酒盡淚欲傾乃知送我者掩袂多至情

汶上阻雪

我行阻徐方日夕望吳國積雪覆皋原千里同一色門
前偃柵橫屋際孤煙直黃河水正堅芒碭雲來黑狡兔
潛以伏飢鷹竟何食客子煨枯蓬主人春殘稷何日見
朝陽肅彼南歸翼

李元昭

新昌蓮峰呂山人夜携魚酒過訪丘中因有此

作

日入林壑晦乳犬吠簷隙下榻焚蘭膏邂逅滄浪客孤
條貫溪魴瓦瓶挈村醪傲睨不作禮蒼霞飄短掖班坐
肆吟笑河漢倚寒席墟落交廣風松篁自相戛優游塵
外懷秉此杯中適第覺五情爽冥然會玄默

黃喬棟

半峰菴聽秀上人彈琴

高僧理鳴琴古調盈人耳濤生松下風龍起鉢中水聽

罷猶冷然月出疎篁裏

陳第

詠懷

尋流溯江漢矯首望河汾
惠風靄四野上有洙泗雲
慷慨懷慕曠世不可羣
歸來長歎息篝燈理遺文
亦有二三策末由播清芬
高山徒仰止微言竟誰聞

水風偶相遇綺文自炳煥
草木花實敷熒熒光且爛
媛姝者何人劬力彌昏旦
秦漢錯雜陳標掇成篇翰
試以

道眼觀臨流再三歎

清寧育萬品種種成形色桃李本繁華松柏挺孤直
鷦鷯老一枝鵬奮垂天翼小大各有宜修短稟物則君子
履吾常何入不自得嗟彼冥行人貪天為己力擔石慕
千鐘下僚營要職畔羨轉相尋憧憧如糾纏鳥飛高戾
天人心於何極所以老氏書止足昭玄式

再送董崇相戶部課績

歲昔在乙巳送君入上京亂流濟扁棹兩岸多鶯聲一

別詎能幾今又送君行濃談殊未盡東曲還憤盈燕薊
正雨雪胡為獨北征行塗登泰岱吳門望正晴上有無
字碑秦漢銘已傾秣陵舊都地守重隔江城國初宿屯
戍五衛列藩營自從崩圯後洲渚坦以平何當存犄角
識者為心驚袖中有短疏意在扣宸明遠臣既建白公
輔會相成願君且靜默造物忌取名

四憶詩

憶昔在清漳帳下多童冠切磨論至德餘義及篇翰別

來四十年凋謝已大半登高望海水茫茫無邊岼欲贈
以瓊瑤踟躕歲復晏

憶昔在薊門坐中多劍客蕭蕭邊馬鳴風高秋草白別
來三十年来薇異夙昔登高望紫塞朔雪沈幽磧欲贈
以寶刀徘徊空脈脈

憶昔在粵東尊前多漁父泛海尋仙山蓬萊若可覩別
來已十年伊人且塵土登高望嶺表浮嵐帶陰雨欲贈
以明珠惆悵肝腸腐

憶昔在武當山中多道侶冒雪陟危峰携筇凌險阻別
來已五年飄飄一羈旅登高望漢水瀟湘迷楚墅欲贈
以金丹歎息獨延佇

歲暮客居呈弱侯

仲尼本周流忽發歸與歎意在就六經匪為思鄉串嗟
我老無聞託興遊汗漫邈想古通人反側常宵半秣陵
一君子少小登道岸嗜學自性成羲易旦夕翫近得從
之談恍上中天觀詩書數千載立語窮真贗欣然遂忘

家何知有歲晏

晨起臨北窗連陰未朗徹昔出桃李花今看霜霰結爆
竹頻有聞天涯近除節而我客南都心跡俱寂滅外戶
常反扃四壁幽以冽執爨雖一夫饕餮良靡缺晏坐展
圖書祛寒親麴蘖時與達人談千古共參折清燈耿前
除談罷自怡悅回首風塵人遲暮正愁絕

陸采

遊仙

明車拂天罡白日駐軒蓋招搖舞青霞芝髓滌玄瀝仙
者四五人黃眉笑相邂玉虬偃靈風瑤鞭靜垂帶謂余
來何遲羞以盤龍膾雙雙紫鴛鴦游戲蓬池內靜婉歌
未窮雨師肅歸轡望望紅羽旂追之了無際

素裝

田家

誰言田家樂所樂亦豈常耕斂稍不給豐歉復相當五
月了蠶事十月登稻梁所入不償用間少實多忙營營

事公私勞苦過卽忘歲功已告畢蜡社聚一方酌酒宰
雞豚鼓腹坐山陽寧知朱門內晝夜羅酒漿貧富在所
遭苦樂難較量

顧聖少

留別謝茂秦

相對忽不樂愴然傷我心他鄉有同懷胡為遽分襟憶
昔醉燕市擊筑誰知音意氣獨吾子排難輕千金重以
易水歌燕之吳會吟論交豈不遠投分遂至今我亦慕

三閭南去湘之陰楚山一何長楚水一何深他日遙相思鹿門還可尋

徐渭

眺江中怪石

乘舟坐無聊遵塗岝轉杳急流赴海馳怪石橫江倒仰睇峇崎側惟見蒼翠矯覆莽映赭壁枝弱不勝鳥懸崖窄可步聚纜密如篠舟子勿前征前路煙生草

將至蘭溪夜宿沙浦

中夜依冰澤，羈愁不可控。
遠火澹冥壁，月與江波動。
寂野聞籟微，單衾覺寒重。
託蹤蒲稗根，身共鷗鳬夢。

柳浪堤為溧陽史氏題

夾岸千章柳，青春翠浪浮。
如將曲池水，共作繞堤流。
長蛇偃青蔭，水鳥悅芳柔。
試於垂纓處，一繫木蘭舟。

與楊子完步浣紗溪梁有懷西施之鄉

明月照江水，截梁與子步。
當時如花人，曾此照鉛素。
江流不改易，月亦無新故。
薄雲淡杪林，晴沙泛寒露。
借言

伊人閨應在煙生處

白鵬

錢子易書故曰王孫蓋鏐之後也

野性悅鳥魚客寓尚籠致正如好竹人借居亦栽蒔鵬
鳥自南來買入西河里王孫好法書籠以易吾字墨絲
繡雪衣綠罽作襦帔有時嚙喉中鳴若嫺雲際日夕湖
水波秋樹葉微紫送客不出門白玉掃長彗

送蘭公子

阿翁學師也揚州人

耶溪芹藻色相伴秋荷老公子竭重來傷心那可道會

日苦無多相別一何早八月廣陵濤一葉渡殘照

燕子磯觀音閣

青山如美人樓觀即奩妝若無一片鏡妙麗苦不昌茲
石一何幸值此江中央上乘巨構支下集帆與檣朱碧
得水鮮鳬鴈拂波光煙霧不見海神去萬里長我與三
友俱兼以僮僕雙日西買市飯半道謝驢羶歸來乏燈
燭微雨霑我裳沽酒不成醉頽然倒方牀猶夢立閣中
遙觀大魚翔

俠客

結客少年場意氣何揚揚燕尾茨菰箭柳葉梨花槍為
弔侯生墓騎驢入大梁

送劉君

南鴈正北歸君今復南去羽族如避炎君胡故觸暑嗟
哉失路人安所避辛苦而我亦同之臨岐淚如雨

沈明臣

武陵莊雜詠

鬢髻石蒙頭斷齧山露齒侈放金谷園清占祇陀里池
館錯紛敷神仙自棲只丹梯引木末清泉陰巖底吹玉
招赤松緘書訊黃綺無事但鳴絃清商雜流徵

王懋明

移家湖上作

夙昔厭喧擾湖壖聊聚廬五柳陰到門客子携家初歡
言治隱計織屨兼藝蔬妻孥哂荒陋而我良自舒魚鳥
適幽性水竹澄貧居開簾峰翠繁停舟潭月虛心與勝

槩遇跡將城府疎養生黃精飯銷憂老氏書了悟損益
理何須儋石儲食力媿伯鸞攻文匪相如所長惟達命
天地寧窮予

始家湖上寄城中諸友

負郭無緒業因家濠湖濱扁舟歸草堂東溪生夏雲居
然滿幽致得與木石羣茲地風俗厚所事不尚文童年
已樵採壯者俱耕耘予懷太古風出門日訢訢稅地給
家食借書廣前聞野趣足心目水流滌炎氛羣山映五

柳空翠常氤氲隱居以求志殷勤謝諸君

舟中與隆池彭丈酌酒

訪舊迴蘭橈風光適和煦卷帷望春山幾處含殘雨偶
爾携一尊歡焉閱衆甫清言無古今滿引無賓主桃花
笑欲言鷗鳥翔可取煙波娛性靈逝將友漁父

宿玉陽山房

澗道行轉深餘霞滅殘景然燈宿山房枕席雲泉冷始
知玉潭隈乃有真仙境翠微一磬幽霽月寥天靜葉落

霜漸寒秋高夜彌永不寐若有懷啼鼃下松嶺

山中待施少府

美人太古心一見即傾倒自別梁溪花相思長秋草緘
書昨寓言山中共論討把袂雖有期挂席苦不早涼月
映桂林夜思傷懷抱

姚咨

桂亭為豫章萬隱君賦

南山鬱秋霽重巒桂花白高人愛巖棲躋攀理輕策覽

彼雲木秀悠然縱所適結亭青林端幽賞非矯迹冷風
吹霞裾涼月挂石壁襲芳和天倪餌實駐顏色淮南詎
可招此意良自得願貽瑤華音一慰山中客

周詩

留別西湖蕪東孔文谷萬鹿園趙龍巖田豫陽
童南衡諸君

淹薄武林游重輪忽四望興諧謝客幽跡類向長放崇
嶺遵逶紆澄湖泛滉漾蓮刹詣諸天香臺徧昭曠聊因

杯度慈一遣迷津安泉挹氣冽清洞厯石攢障側足凌
層梯迴與丹霞傍煙綿百雉聯截嶠兩峰向曬越吳山
巔觀濤海門上哀莽弔遺墟懷往情亦愴攀踐匪一塗
靈異信多狀景物無遁形微尚自茲暢會心既以玄感
來寧弗亮結侶得應劉調逸每相抗傾座激懸河芳飈
企予仰綢繆林中娛萬事等飄塊發詠互酬荅真賞繇
郢唱淒其祖歲陰曰歸介征榜踟躕行復留念此意彌
廣斷梗惜臨流撫膺吐深恨

春日子浚置酒登盤門城樓縱眺

出游躡城闌聊使殷憂廓迴瞰樓闕重周覽河山錯候
禽音尚微初林蔭猶薄密煙生近堤傾曦淡遠落潛盤
狎勝引且復娛斟酌快意當遺形所在即丘壑

牟嘉叙

擬古

驅車出門闌車行復遲遲百草委霜露涼風正淒其天
寒道路艱問君將何之駕言往宛洛相從遊俠兒遊子

去萬里旋歸竟何時安得附飄風致此殷勤辭

灌木產崇岡鬱鬱蔽層丘芳草依澗側託蔓相綢繆美人隔遐方宜為君子仇未及登君堂歲月倏已遒慨彼芙蓉花爛漫當清秋采采欲為贈道路阻且脩願君保明哲妾心亦何尤

遊江心寺登康樂亭子

輕舸截奔浪水國散微陰沿洄眺孤嶼寶塔凌雙岑茲遊夙有期始得遂幽尋淵室接梵語花臺繞龍吟滉漾

元氣中日華映珠林謝公有遺蹟孤亭俯江潯曠懷寄
玄賞海嶠振徽音清芬詎可挹高情傾古今西堂夢不
返池草春自深

同方用晦遊西谷

褰裳涉西沚披莽散輕屨稍觀山川異煙火隔墟落沿
洄傍溪曲窈窕入穹壑幽尋葛可捫晻曖路疑錯巖雲
冒巾幘霏翠灑林薄汲深俯重淵采秀陟崇嶸坐聆伐
木音益感良遇樂返策復流憩逍遙展歡譔眷茲丘園

賞胡為就羈縛

漁家用從姪存勇韻

茅茨傍江口斷岸依漁梁
榜舟蘆花渚間歌和滄浪
日出水禽散風至蒲帆張
青蓑溼不解卧看南山蒼



御選明詩卷二十九



總校官庶吉士臣侍朝
校對官檢討臣蕭九成
謄錄監生臣傅瓌芳